

Skýrsla stjórnar Vísindasjóðs Krabbameinsfélags Íslands til stjórnar Krabbameinsfélags Íslands um starfsárið 2017

Inngangur: Vísindasjóður Krabbameinsfélags Íslands var stofnaður 16. desember 2015 af Krabbameinsfélagi Íslands og aðildarfélögum þess auk þess sem inn í sjóðinn runnu Sjóður Kristínar Björnsdóttur fyrrverandi starfsmanna Sameinuðu þjóðanna og Minningarsjóður Ingibjargar Guðjónsdóttur Johnson. Heildarstofnfé sjóðsins var 254,6 milljónir króna.

Tilgangur: Samkvæmt stofnskrá er tilgangur sjóðsins að efla íslenskar vísindarannsóknir á krabbameinum, m.a. með því að styrkja með fjárframlögum rannsóknir á orsökum krabbameina, forvörnum, meðferð og lífs-gæðum sjúklinga.

Stjórn: Stjórn Vísindasjóðs Krabbameinsfélags Íslands skipa sjö einstaklingar, tilnefndir til tveggja ára í senn af stjórn Krabbameinsfélags Íslands, og fimm til vara. Í stjórn sjóðsins árið 2017 sátu Stefán Eiríksson formaður, Sigríður Gunnarsdóttir varaformaður, Guðbjörg Edda Eggertsdóttir, Hermann Eyjólfsson, Magnús Karl Magnússon, Magnús Pétursson og Tinna Laufey Ásgeirsdóttir. Varamenn voru Anna Kristín Jónsdóttir, Árni Þór Árnason, Ásgerður Sverrisdóttir, Ólína Ingibjörg Gunnarsdóttir og Sigurður B. Stefánsson. Frá ársbyrjun 2018 var Sigríður Gunnarsdóttir skipuð formaður, í stað Stefáns Eiríkssonar sem gaf ekki kost á stjórnarsetu lengur, og Sigurður B. Stefánsson var skipaður í aðalstjórn.

Fundir: Stjórnin hélt fjóra fundi á árinu 2017, 18. janúar, 25. janúar, 21. apríl og 25. apríl. Á fyrri fundunum var farið yfir úthlutunarreglur, umsóknareyðublöð og auglýsingu um styrki. Á síðari fundunum var fjallað um styrkumsóknir. Jónas Ragnarsson var ritari sjóðsstjórnar.

Fjármál: Ársreikningur sjóðsins var staðfestur og undirritaður af stjórn sjóðsins á fundi 25. apríl 2017. Starfsmenn Krabbameinsfélags Íslands annast fjárhagslega umsýslu sjóðsins í samræmi við fjárfestingarstefnu hans.

Styrkumsóknir: Samkvæmt stofnskrá sjóðsins skal stjórn sjóðsins auglýsa eftir umsóknum um styrki í byrjun febrúar ár hvert og annast styrkveitingar úr sjóðnum að fenginni umsögn Vísindaráðs Krabbameinsfélags Íslands. Hlutverk Vísindaráðsins er að leggja mat á gæði umsókna, færni rannsakenda o.fl. samkvæmt nánari fyrirmælum í úthlutunarreglum sjóðsstjórnar. Í samræmi við þetta var í byrjun febrúar 2017 auglýst eftir umsóknum um styrki úr sjóðnum. Alls bárust 23 umsóknir að upphæð 99,5 milljónir króna. Vísindaráð Krabbameinsfélagsins fór yfir umsóknirnar og ritaði umsögn um hverja umsókn. Stjórn Vísindasjóðsins fór í kjölfarið yfir allar umsóknir, umsagnir og tillögur Vísindaráðsins og tók ákvörðun um úthlutun úr sjóðnum á fundi sínum 25. apríl 2017.

Úthlutun styrkja: Samkvæmt stofnskrá sjóðsins hefur sjóðsstjórn árlega til ráðstöfunar tekjur sjóðsins á liðnu starfsári auk þess sem sjóðsstjórn er heimilt að verja allt að 10% af höfuðstól sjóðsins til styrkveitinga. Þeir fjármunir sem ekki eru nýttir til styrkveitinga eru lausir til ráðstöfunar næsta ár. Í ljósi þess að engin úthlutun fór fram á fyrsta formlega starfsári sjóðsins, þegar unnið var að úthlutunarreglum, starfsreglum, fjárfestingarstefnu o.fl., hafði stjórnin til ráðstöfunar 61,3 milljónir króna, þ.e. það hlutfall höfuðstóls sem laust var til styrkveitinga og tekjur ársins. Að fenginni umsögn Vísindaráðsins og í kjölfar mats á fyrirliggjandi umsóknum var ákveðið að styrkja þau rannsóknarverkefni sem Vísindaráð mat í hæstu gæðaflokkum, í samræmi við úthlutunarreglur sjóðsins. Niðurstaða stjórnar Vísindasjóðs Krabbameinsfélagsins

var að úthluta 42,6 milljónum króna til ellefu rannsóknarverkefna. Um var að ræða fjölbreytt verkefni, sem falla vel að tilgangi sjóðsins. Styrkirnir voru afhentir 6. maí 2017.

Styrkir úr Vísindasjóði Krabbameinsfélags Íslands árið 2017: 1. Margrét Helga Ögmundsdóttir hlaut 7.500.000 kr. styrk fyrir verkefnið *Hlutverk sjálfsátsgensins ATG7 í þróun krabbameina*. 2. Guðrún Valdimarsdóttir hlaut 6.300.000 kr. styrk fyrir verkefnið *Samspil TGFβ boðleiðarinnar og Thrombospondin-1, áhrif á samskipti æðapels- og brjóstakrabbameinsfruma*. 3. Erna Magnúsdóttir hlaut 5.000.000 kr. styrk fyrir verkefnið *Sameindaferlar að baki BLIMP1 og EZH2 miðlaðri lifun í Waldenströmsæxlum*. 4. Þórarinn Guðjónsson hlaut 4.560.000 kr. styrk fyrir verkefnið *Hlutverk non-coding RNAs í greinóttri formgerð og bandvefsumbreytingu þekjuvefjar í eðlilegum og illkynja brjóstkirtli*. 5. Birna Baldursdóttir hlaut 4.360.000 kr. styrk fyrir verkefnið *Prófun á gagnvirku ákvörðunartæki sem aðstoðar karlmenn, sem greinst hafa með staðbundið blöðruhálskirtilskrabbamein, við ákvarðanatöku um meðferðarleið*. 6. Stefán Sigurðsson hlaut 4.000.000 kr. styrk fyrir verkefnið *Áhrif stökkbreytinga í BRCA2 á vefjasértækni og þróun krabbameina*. 7. Valtýr Stefánsson Thors hlaut 2.814.000 kr. styrk fyrir verkefnið *Miðlægir bláædaleggir hjá börnum með illkynja sjúkdóma. Fyrirbyggjandi aðgerðir og eftirlit með fylgikvillum*. 8. Inga Reynisdóttir hlaut 2.145.000 kr. styrk fyrir verkefnið *Hlutverk microRNA á 8p12-p11 í framvindu brjóstakrabbameins*. 9. Erla Kolbrún Svavarsdóttir hlaut 2.000.000 kr. styrk fyrir verkefnið *Þróun meðferðarsamræðna við konur með krabbamein og maka og áhrif samræðna á aðlögun tengda kynlífi og nánd*. 10. Gunnhildur Ásta Traustadóttir hlaut 2.000.000 kr. styrk fyrir verkefnið *Hlutverk Delta-like 1 homolog (DLK1) í greinóttri formgerð brjóstkirtils og brjóstakrabbameini*. 11. Aðalgeir Arason hlaut 1.940.000 kr. styrk fyrir verkefnið *Leit að erfðabreytileikum með fjölgenaáhrif á myndun brjóstakrabbameins*.

Lokaorð: Það er mat stjórnar Vísindasjóðs Krabbameinsfélags Íslands að sjóðurinn hafi skotið styrkari stoðum undir íslenskar rannsóknir á þessu fræðasviði. Umsóknir um styrki úr sjóðnum voru í háum gæðaflokki og því má binda vonir við að niðurstöður þeirra skili árangri í baráttunni gegn krabbameinum, með einum eða öðrum hætti. Stjórn sjóðsins mun á næstu mánuðum huga að því hvernig unnt er að efla sjóðinn enn frekar. Í lokin er þökkun veitt aðstoð Krabbameinsfélags Íslands við starfsemi sjóðsins á starfsárinu 2017. Jafnframt er komið á framfæri þökkum til Vísindaráðs Krabbameinsfélags Íslands, sem skipað er nú öflugum vísindamönnum undir forystu Þórunnar Rafnar, en ráðið hefur lagt á sig mikla vinnu við umfjöllun og mat á umsóknum.

Reykjavík, 1. maí 2018

Sigríður Gunnarsdóttir,
formaður stjórnar Vísindasjóðs Krabbameinsfélags Íslands.